

تناهى

شعر

فرید طه

فرع الشرقية الثقافي

سلسلة خيول أدبية

المستشار / يحيى عبد المجيد محافظ الشرقية	الفنان / د . أحمد نوار رئيس الهيئة العامة لقصور الثقافة
الشاعر / مصطفى السعدني رئيس الإدارة المركزية لإقليم شرق الدلتا الثقافي	الفنان / محمد الشاعر مدير عام ثقافة الشرقية

هيئة التحرير :

إبراهيم عطية
أحمد سامي خاطر
أحمد عبده
بهي الدين عوض
سهير مكاوي فرج
محمد عبد الله الهادي

وكما تواعدنا دائما أيها المحبون نلتقي على حب الكلمة
وسمو الحرف ، ورفعته المعنوي ، فالأفق هو عالم الإبداع الأكثر
انفتاحا وتطلعا لكل ما هو صدق وبهاء ، إنه الشاهد على حلم
التطلع للضحى الكامن في أعماق أعيننا ونحن نتطلع لرؤية
نصيبها أو غاية نشدها ، وبكل ما نملك من رغبات حرة ، لا
تحدوها المنافع والأهواء والمصالح الخاصة .. إنه الحلم الذي تشده
الفنون ، ولأسيما فنون الإبداع الأدبي .. ذلك الأفق الذي نطالع فيه
(خيول أدبية) في طرحها الثاني ، وهي تركض نحو تأكيد
قدرتها على اللحاق بركب السيطرة والانتماء والتفوق ، وفي
موكب الحق والخير والجمال ، ذلك الثراء الفكري والثقافي
والإبداعي الذي دعمه ، بل واستثمر فيه معالي الوزير المستشار
بحي عبد المجيد محافظ الشرقية ، ليكتمل البهاء والاستمرار ،
وفاء بوعد النبلاء في احتضان أدباء وشعراء هذه المحافظة الثرية
والخصبة في شتى المجالات والفنون ، إنه حرث الفنان / أحمد نوار ،
الذي ولي وجهه شطر أصحاب الفكر بالقلم ، أو بالفرشاة سواء
ليؤكد أنه الزمن الذي يتحتم علينا فيه أن نؤكد - بما في الفنون
من لغة مؤثرة - على ضرورة النظرة بإنسانية إلى العالم ،
لنتمكن من الانتماء .. بل والتماهي فيه .. مدعوما بورود الشاعر
الأرقى مصطفى السعدني الذي يضيف على المشهد الإبداعي بهذا
الإقليم الخصب جمالا مضافا ، باقترابه المقترن بالرعاية ، وحرصه
الدائم على اكتمال البهاء .

والله الموفق

الفنان / محمد الشاعر
مدير عام ثقافة الشرقية

الإهداء

.. إلى ..
قلب اللى عارفه إنتى ...
وأنا قلبى عارف إنها ...
لكننى ... لكنها ...
والحلم لسه بي طرح العناقيد
لحظة لُقانا أصبحت تناهيد

تناهيد

تناهيد ياليل حيارى
ياصبايا ومجروجين
تناهيد والليل وسُهده
متسطر ع الجبين
تناهيد والعين رموشها
ع الدمعه مسيلين
.. ..

يا متهد قلبك
مجروح من تنهيداتك
يا متهد حبايبك
بيرضوا ليه آهاتك
وقلت ياموج عطاشي
لصبايا مركباتك
ولا يطفيش لهيبى
غير موجه من موجاتك
يامركبة الصبايا
وشط الشوق بعيد
وأنا والموج حيارى
من كتر التناهد

وليه إنت

وليه إنت ؟
ساعه م أسمع حروف اسم
أحس بقلبي بيرفرف ... و يتلهف
كطير حيران
كانك حته من عمرى
ف كف زمانى خبيتها
و فجاء فى حلمى لاقيتها
وحبيتها .. ف علم الغيب
سنين و سنين
و ما اعرفشى حروف اسمك
د تبقى لمين
يا ساكنه جو ننى العين
و عيني نفسها تشوفك
و احط الخمسه والستين ... سنه
من عمرى ف كفوفك
لقلب عجوز سند روحه

على عكاز سنين عمره
وجرحه زمانه من شوقك
و ليه طيفك
أنا ديما معاه ف حوار
يا أجمل زهره ف الأزهار
سنين عمرى بقت صبار
مائش عارف .. دليلي أختار
و ليه قلبي ساعه م أختار
و قف عندك
و عدى لك جميع لسوار
صحيح الكون د بحر كبير
ملان أسرار
أنا قبلك قابلت كتير
و شفت كتير
لكنك إنت أول قصه باكتبها
و آخر قصه ف الاساطير
وليه خليتي يوم طيرى ف سماكى يطير
و يبقى أسير ملاك طاهر
بقالب كبير
و ليه إنت مائش عارف ؟
و لسوالى مقيش تفسير .

نهاية المطاف

إهربي م الاعتراف
وانكري لهفة مشاعرك
عند لحظة لنصراف
بررى عطشك وقولى
إن نبيك مش محاصر لجفاف
وإحيسى طوفان عواطفك
اللى فايضه على الضفاف
وإعلنى رفضك .. لرفضك .. لعتراف
وإكتبى كان غصب عنى يا زمن
فوق الغلاف
بكره حتقولى الحقيقه
بس فى آخر المطاف

ما تحلميش

ما تحلميش بالمعجزه

الا إذا

قلبك غزا

سماوات ملانه بالشذا

والحب والظهر النبيل

متصدقيش المستحيل

إحنا في زمن

أصبح وفاء الناس قليل

والحق فيه بيتشوهوه

لو كان له الف وميت دليل

وانت كريمه

إنما زمتك بخيل

خبي براءتك جو قلبك م الأذى

حبك بقي لقلبك لظا
ومدنه بقيتي على الصراط
والنار بتطير شظا
دارى اللى جو عنك جميل
وما تحلميش بالمعجزه

حلم ليلة صيف

وكانت حلم ليلة صيف
صحيت منه
مائش عارف
د حلمى وللا أنا سارقه
من اللى حلموا من قبلى
وصحيوا زى أنا م صحيت
و عرفوا قبل أنا ما أعرف
بان حلاوة الأحلام
فى لحظة وانت م بتحلم
ولما بتصحى من حلمك
ببقى الحلم قدامك
سراب ... أو هام
وأنا حلمتك .. ملاك طاهر
فتح قلبه وحببته
واقسمت بيمين الله

ما أنا صاحي
من الحلم اللي ظنيت
نهاية المي وجراحي
لكنى نسيت
ومن حلمي الجميل فجاء
لقيتني صحيت
ولكني فضلت أحلم وأنا صاحي
وفجر الحلم بيشفق
و أنا صدق
لكنى لقيت ساعة م صحيت
مفيش أحلام بتتحقق
وكان مقروض أعيش أحلم
بقيت عمرى
و أدنى فى جنة الأحلام
وما أنسايش ... وأنا نا حلم
أدنى أحلم وما اصحاشى
وما افضلش على جسر الأهات ماشى
وأنا مخدوع
لأنى لو صحيت ح القى
جمال الحلم فى عنيه
أهات ودموع

بتحلم بأيه

بتحلم بأيه؟!
وبتصحى فى عذاب جرحى ليه
معدش ف زمانى
لحبك أمانى
ولا عمر تانى
أعيش حلمى فيه
أنا غصب عنى
ولو بالتمنى
أمنيك بحبى
وتندم عليه
معدش فى حياتى
سوى ذكرياتى
وزمنى اللى اتى
ماليش خير فيه

مفیش غیر تمنی
فی ظنک وظنی
وضاع حلمی منی
حتلم بایه ؟!
حتلم بایه .. ولا ایه .. ولا ایه ؟!
أنا حلمت قبلك
ولما أبتدیت
أعیش حلم عمری
لقیبتی إنتهیت
وقلت لزماتی
یاریتک ما جیت
مش إنت الزمان
اللی أنا حلمت بیه
ولا عشت عمری
أدور علیه
قلملم جراحک
وحلمک داریه
وحلمک مسافر
ومش حتلاقیه
حتلم بایه ؟!

الربيع

الربيع هو الجمال
والموده .. والوصل
الربيع دا بنت فايره
ف الهوى ضفايرها طايرها
ماشيه تتعاجب بروحها
كلها خفه ودلال
وانت قاطف ورده حمره
والغرام ف القلب حمره
تهديها لها ... تبتسم لك
تتشغل بك .. تنقسم لك ..
و ف خيالك تترسم لك
حسن فاق وصف الخيال
تلقى قلبك دق دقه
كلها أشواق ورقه
طنب في بنت الحلال
والسبب كلن ورده حمره
والربيع هو الوصال

إلى نصفى الآخر

يا أوفى الناس
يا بحر الطيبه .. والإحساس
يا أزكى من روائح الطيب
يا قلب حبيب
يا أغلى من كنوز الماس
زمانى كان جراح .. ف جراح
وكان نفسى ف يوم أرتاح
وصدقه رسيت على شطك
وطارلى فى سماكى جناح
لقيت كونى اللى كان ديق

بقى فى نظرة عنيكى براح
وبدلتى بنور ضيك
سواد ليلى بألف صباح
يا أوفى الناس
يا بحر الطيبه والاحساس
يا أذكى من روايح الطيب
يا قلب حبيب
واغلى من كنوز الماس ..
يا أطيب قلب ف الدنيا
يا أوفى الناس

يا ربح

يا ربح يا مهفـف ..
فساتين الصبايا الملاح
إفرد ضفاير حبيبتي
ع السهول البراح
هز هز شواشي الشجر
وإنزل مطر
على خدها
يتلون التفاح
وإعمل من الزهر شال
للناهد المختال داريه
نطقت كنوز الفتنة فيه
و بسره باح
و أنا ياربح ملاح
وشراعي تايه ..
جو بجر عيون حبيبتي

والهوى .. فضاخ
وانا قلبى عصفور جريح
شيلنى ياريج فوق بساطك
حطنى ..
م بين جدائل شعرها
أرتاح

أنا مش نبى

فى عنيك باشوف حلمى الصبى
يا بدر نور فى السما ليل مغربى
لو تعرفى أنا قلبى حبك قد أيه
تستغربى
وما تزعلش من جُرئتى
أو تعتبى
كان نفسى أهرب م الحقيقة
زى م أنت بتهربى
وحاولت أبعد ..
التقيتنى كل م أبعد
من خيالى تقربى
أنا قلب شاعر .. والهوى
عشقى وحياتى ومذهبى
طير الهوى فرد الجناح
وشب عن طوق الصبى

ما أقدرش أجيبه من سماكى ..
لأرضى تانى
أنا مش نبى
وما تطليش المستحيل
راح تتعبى
وحرام عليكى تفضللى
بين التردد والضياح تتعذبى
طب جربى
مر الخروج من دايرة الخوف الغبى
وما تطليش المعجزة
راح تغلبى
يا معطره بستان أمل حياتى و كوكبى
أنا مش نبى
و لا أنت رابعه
و لا الزمن
عزفه يخليك تطربى
يا عيون ملاها الشوق سهاد
فات الميعاد
لكن بإيدك تبتدى تانى الميلاد
ومن هنا بحر الوداد
وسلسيله تشربى
خايف عليك

المع يملأ يوم عنيك
وتخفق حلمى الصبى
و أنا قلبى حيك .. وإنشغل بك
إنما أنا مش نبي

عطش

كتبت شعري على الرملة
وانت حوريه ممدده ع الشط
شط الهوى منى على سهوه
عصفور كناريا ع الضفاير حط
طير معاه الشعر .. والرمله
وسرسبه على داير الفستان
إتشكلت كل الحروف على صدرك المرمز
بساتين زهور ..
على كافة الالوان
سيان يشب الشعر يتنهد على صدرك
أو في الضفيره
تمرجحيه .. سيان
الفرق ف الاحساس
بلحظة ويجدك
والشوق كمهره

بتعلن العصيان
و أنا بارسمك بخيالي
لحظة تجلى
صور تحير ريشه الفنان
و باكتبك أشعار بابجديات جديده
وباطبعك على صفحة الوجدان
أسرح .. تهب الريح
تبعثر حروفي
فوق الضفاير
يرتوى العطشان

سؤال

بتحبنى مش كدا ؟
قلت الهوى مطلوب
قالت وبغير على ؟
قلت موت وبأدوب
قالت طب إوصف لى حبك
قلت نار وذنوب
قالت و آخره عذابك ؟
قلت نفسى أتوب
قالت تتوب عن هوايا ؟
قلت و المطلوب ؟
قالت أكون دنيتك اللى تعيش بيها
و أكون نعيم آخرتك و حوريتك فيها
قلت ياريت ربنا منك يلببها
وتكونى ناعمة هوايا
و أنا ف هواك أيوب

المهم حتستمرى ؟

المهم ... حتستمرى ؟
قيل م... السنين
عمرى ما فكرت إنى
القى تانى فى يوم حنين
إنتى بالإحساس بقيتى
نبض قلب ... وننى عين
إنت دره وكنت تايهه
والتقيتك ...
حتفوتينى لحيرتى تانى أروح لمين ؟
نفسى أقول لك كلمة مش قادر أقولها
من سنين
ليه فتحتى كنوز عواطفى
اللى غطاها الأتئين
يا حبيبتى أنت صحيتى الأمانى
بعد ما رجعتى روحى لى تانى

إنت ليه مديتي طوفك تتجديني ..

من زمانى

اللى خد منا الامانى

واللى سابنا مجروحين

إنت جيتى تفرحينى

وللا جيتى تجرحينى

وللا جيتى تعشمينى بجنتك وأرجع حزين

كل شئى جايز و ممكن

تبقي جنوى .. تبقي مرى

تبقي حرى .. تبقي ضللى

المهم ... حستمرى ؟

وللا أيامك حتبقى

ذكرى تطويها السنين ؟

اعتذار

كنت طالبك أعتذر لك ... عن عواطفى
ما تخفيش
اللى بينا كان سحابة صيف وعدت
حلم عد ما يتسبش
مهما كان الجرح ح أقدر
برضه من غيرك أعيش
وإنت .. إنت .. زى م أنت
حب غالى ما يتسبش
تطلبينى .. حتلاقينى .. قلب طيب
زيه أيدا ما تلقيش
عمره ما يتخلى عنك
تخلصى له ... ما تخلصيش
أصلها ما بقتش تفرق
عارفه ليه ما تفكرش
الظروف كت أقوى منك
والهروب كان غصب عنك

حيره و إنت تايهه بينها
ترفضيني ... تقبليني ... ما تقبلش
والعواطف لعبه صعبه
ليه قبلتي تلعبها
و إنت لسه ما تدر كيش
ليه رضيتي أكون ضحية بتخدعيها
ليه عواطفك بتداريها
عن عنيه ما تنكريش
قلبي أكبر و إنت عارفه
إني كنت جناح وريش
ما تخفيش
مش ح احاول أشوف سعادتك
وي غيري و أعترض
ما تبررنيش
إنت خره في إختيارك
ما بتدارنيش
وما أطلب أعتذارك عن عواطفني
إبقى ردي ما تهربنيش
بس لما تحسي مره
إنك إنت اللي ابتديتي
ما بتدميش

نصيب

فهميني أيه حكايتك ؟!
واشرح لي فصول روايتك
إنّ صمتك .. و ابتسامتك
سرهم شايقه ف مرابتك
شئ يحير
شئ غريب
إبتسامه السحر
ع الوجه الحليب
والعين حلم المسافر
واللقا قسمه ونصيب

صدقيني

صدقيني
لما باتخيل ملامحك
بالتقيني
طير وضمك بجنحيني
وإنت عصفورة كناريا
ساكنه قلبي وننى عيني
تستحمى بشوق عواطفى
و بحنيني
تجمعى زهر المحبة
تبني عشك بين جفوني
أبقى شوقك .. وإنت شوقى
تبقى أجمل شمس طالعه ..

من شروقي
تبقى نهر الحب بيصب ف عرقى
صدقيني
كل ما أتخيل ملامحك
بالتقيني
أبتدى فى كل لحظه ..
ميلاد سنينى

حب زمان

إنت سحابة صيف ح تعدى
وتفرقيني
وأنت فى سحر عنكى تعدى
كل م أحاول تتحديني
م تخلىنى أمر و أعدى
وما فيش داعى
تعبى شراعى
برياح حبك و تمنينى
اصل سفينتى .. إن غادرت مينتى
لبحورك مش ح تعدينى
و إنت سحابة صيف ح تعدى
وتفرقيني
..
خللى م بينى وبينك حا جز
خايف طيرى لما يطير لك
يرجع عاجز

ماتخليش النار تكويني
كنت أتمنى هواك بتتلنى
علشان جو عنيك تحيينى
وانت سحابة صيف ح تعدى
وتفرقيني

..

آه لو أمر الحب بإيدى
كنت دفعتك جو وريدى
علشان تبقى النبض الحانى
و إتمنيت تلمسنى عيونك
و أفضل فيهم أعشق قيدي
كنت ملبت الدنيا أغاني
بهجه وحب وشوق وامانى
آه لو جرحك حس جرحى
كنت عرفت إزاي بأدارى
دمعى يفرحى
كنت ملكتى بنيل شعورك
كل جوارحى
وبألوان طيفك لونتى
كل ملامحى
آه من آه بتشقى جوانحى
لما أفكر إن ف يوم ممكن أنساكى

أو تنسيني
أو الاقيكي زى سحابة ضيف بتعدى وتفارقيني

..

ما أتمنيش فى عمرى أشوفك
ولا كان ظنى أدوب فى حروفك
ما أتصورتش إن الدنيا ..
فيها مشاعر حب جميله
حتعيشنى فى عالم تانى
ولا فيه زيك مخلوق يقدر
شغره يصحى جرحى الساكن جو كيائى
لمى متاعك قيل الريح ما تعبى شراعك
وتعدينى لبر وداعك
تبقي الذكرى بحور نسيان
وأرجع اسأل يوم عرافى
يقدر موسى بسحره يرجع
حب زمان

احتمال

لما قلت لها اللي بينا من محبه
لسه فى قلبك : زال ؟
صمتها جاوب السؤال
قلت جاوبى وريحينى ؟
دمعها ع الخد سال
قلت ليه بتحيرنى ؟
.. مش محال ..
حلما يصبح حقيقه واللى فات نرجع نعيشه
عمر أطفى
م اللي عشناه ف الخيال
واحتمال دنيتنا تنسى
وكفها يمسح دموعنا
والليالى تفتكر وتقيد شموعنا
والزمن يضحك لنا ويعيد ربيعنا
إحتمال لو تجاوبى ع السؤال
لسه فى قلبك مساحه لحب تانى ؟
بعد لحظة صمت قالت
لما أنسى جرح حبي الأولانى
.. إحتمال ..

تعبت من الجراح

تعبت من الجراح والآه
وجيت أرتاح على شطك
من الماضى اللي خد أجمل سنين عمرى
وفات لى أساه
وعشت العمر أستنى ... و أتمنى
يعوضنى الزمن مره ..
عن الحلم اللي ضاع منى
وضعت معاه
وفجاء يقينى فى الجنه
وأنا واقف على شطك ..
ما صدقتش
زمانى فى يوم ح يضحك لى ..
وحتهنى
فمتفتنيش ..
لحيرتى وزمنى من تاتى

يرجعنى لأحزاني ..
والقاني
نديم الآه
و أقول لك آيه
و أنا قولى صبح عاجز
وخوفى م الجراح حاجز
بيمنعنى
أقول لك إني حبيبك
دليلي إحتار
أقول لك .. وللا ما أقولشى
ما نش عارف
و قلبى م الجراح نازف
ومش قادر ياروحى إختار
ويظهر العذاب مكتوب ومتسطر
وجرحى فى الهوى مقدر
سوى فى الجنة أو فى النار
كان الدهر مستكثر ..
يشوف الشوك ببستانى
فى يوم أزهار
ويحرمنى من الجنة اللى نستنى ..
عذاب عمرى
ويزرع أرضى بالصبار

مانش عارف أقول لك أياه

قولى لى إنت

و أنا راضى

تكونى الخصم و القاضى

إذا ما قلت حبيتك

و قلبى فى قربك إتهنى

حترضى تفتحنى الجنه

لطير ملهوف بيتمنى

يكون ملاح ..

فى بحر عنكى و يرفرف

بالف جناح

ويسكن جو جواكى

و من بعد الضنا يرتاح

و خايف أمله يتبدل

يا أجمل حلم فى الدنيا

دموع و جراح

حوار مع برج العقرب

كنا فى قعده وجدال
والحد ساحن م بينا
فى انفعال
واللى قالت .. واللى قال
والحريم فى الراى ..
بتخالف الرجال
و الكلام فيه اللى وافق ..
واللى رافض
واللى مش عاجبه السؤال
فجأه كل القعه بصت
ع اللى داخله وبذل
حاجه فوق الوصف تلحس
سيمفونيه من الجمال
غيرت مجرى التحاور .. بينا
من حال لحال

اللى قال اهلا وسهلا
واللى شاور ..
الف مرحب يا غزال
زاد دلالتها لما شافت
القلوب طالبة الوصال
وبشياكه وخفه قعدت
الجميع كان فى إنشغال
بعد حبه
دخنت أول سيجاره ..
فى إنفعال
قلت مالك ؟ .. ساكتة ليه ؟
لوحى لى بضحكه ساهيه
قلت اسمك يبقى أيه ؟
غيرت لهجة عنيتها فى التحاور
قلت ليه ؟
إبتدت تخفى إنفعال أطراف إيديها
ومأ شفت عتاب عنيتها
م السؤال
قلت طب لو تسمى لى
إنت أول حرف ف اسمك
يبقى أيه ؟
بعد لحظة صمت ساهى .. فكرت ..

قالت عليه
قلت متشكر تمام
طب وتاني حرف ؟ ..
قالت ...
مش حقول لك حاجه بعده
بس قول لي مش موسيقى؟
قلت رانع ... ده كفايه
قالت لي ليه؟
قلت -الت حرف عارفه
بعد لحظه صمت قالت
قول عليه
قالت ...
قالت صح ... لكن
ليه فيه حرفين كمان
قلت اقولهم
باندهاش قالت يارب
قلت يبقوا كيت وكيت
قالت ياه.. لا كذاب
مش معقول
قلت تحبي ياروحى أقول
تليفون بيتك والمحمول ؟
قالت قول

بس بسرعه جاوبنى قوام
يخرب عقلك إنت بتسحر
وللا عرفت د فى الاحلام
قلت وعارف حتى ميلاد اليوم والعام
وطت صوتها وقالت قول لى
إنت عرفت د كله إزاي
قلت مساء الخير يا مدام
كل أصحابى قالوا لى بنعرف
واحد بنفس الاسم تمام

لعبة الدموع

غيرى لعبة دموعك
مستحيل ح أقبل رجوعك
ليه حاولتى تفهمينى
قلبي عايش بين ضلوعك
ليه يتى تخدعيني
بانكسارك ... وبخضوعك
كنت واثقة من عواطفى
وبهواك لعبتى بيها
مره تخضع لابتسامتك
مره بالدمع تواسيها
مره تالتة بالتمنى تـ عيها
كنت فاكـره الحب لعبه بتلعبها
ومـا تخلص تبتديها
مـش ح اصدق مره تاتيه
إنكسارك ... وإنهيارك
كديه كنت بتكديبها
غيرى لعبة دموعك وفريها

ابعدى

إبعدى .. ما تقربيش
قصصى جناح العواطف
إلى طار وطلع له ريش
إنت مش قد العواصف
إسمعنى .. ما تعديش
جرح تانى ؟!!
و إنت قلبك لسه عايش
جرح حبه الأولانى
صدقينى
وى أو هام الأمانى
ما تعشيش
ما تسببش الحب يلعب بالعواطف
إفقلها قزاز وشيش
و إدى قلبك فرصة بقدر ..
وى حب كبير يعيش
حب مخلص زى حبك
بعد منه ما تندميش

شراع الهوى

قلبي اللي كان
عاشق زمان
لملم شراع الحب ..
من بحر الهوى
ليه بتناديه
ليه راجعه تاتى تفرديه
وتصحى فيه
جرح الاحبه وكان نسيه
ليه راجعه بس تعشميه
ما تزوديش فى القلب جرح ملوش دوا
حرام عليك تجرحيه
ان كنت ناويه تخدعيه
يكفى عليه جرح الهوى
.. ..
يا صوت حنون
عزف على وتر الآهات

صحى الشجون
و فاتنى بين الذكريات
غريق على شط الظنون
ملاح رماه
قارب هواه
جو العيون
ولما تاه
حبك نداه
قلبي عمل لك طوق نجاه
آهين .. و آه
عاشق جناح حبك طواه
مشوار طويل
والخطوه فوقه بالف ميل
وأنا والعذاب والمستحيل
سهرنا ليل .. من بعد ليل
و لما طال بينا السهر
و قلبي قال .. يا ليل عليل
ضحك القمر لليل وقال
الصبر للعشاق جميل
يا ليل يا عين .. و يا عين يا ليل
لمين أروح يشفى الجروح
و لمين أبوح .. سر الهوى

محتاج طبيب .. يكون حبيب
وقلبي لي يكون دوا
الصبر قال .. د شئ محال
ما بيدويش جرح الهوى
الا الهوى

عمرى ما أحنيت

هاتى كراستك معاكى
و إفتحى الصفحة اليمين
و إقفلى شباك هواكى
اللى طار منه الحنين
و أقعدى بشويش حداكى
و إمسكى قلمى الحزين
و إكتبى
كان قلب شاعر
إنطفت فيه المشاعر
و إنكسر قوس الربابه
فوق وتر مغرم صبابه
إكتبى ..
الحب غايه
يفترس فيها الديابه
كل صوت يطلع يغنى
لحن مخلص للغلابه

و إكتبى إنك بقيتى
سطر ممسوح الكـاتبه
إكتبى
ضاع اللي ضاع
و إنطفأ ضى النـعاع
و إن أول ما إنقلبنا
إبتدى درب الضياع
و إكتبى ملحوظه عندك
كل شئ أصبح مشاع
و الزمن فى الحب ساوى
اللى أخلص باللى باع
إكتبى عنوان كبير
إنكسر قيد الأسير
بعد م الايام فى حبك
ضيعت قلبه الامير
لو سمحتى تمسحيه
و إرجعى تالى إكتبيـه
إن فيه أزمة ضمير
و الحقيقه ..
تحت موج الزيف غريقه
و الهوى اللى كان م بيننا فى يوم
خديعه

والعواطف الرقيقه
من تهم ظنك برينه
د الحقيقه ..
اكتبى .. مجروح فاتونى
و ف طريق الشوك رمونى
و بلهيب النار كوونى
و مآ قلت الآه لامونى
لاجل أشكى ... ما أشتكى
لاجل أبكى ... ما بكيت
إنما من جرح جرحى
قمت تانى و ابتديت
و بمرار الصبر .. جرحى ..
خف وبمره إندويت
و ابتديت أفتح كتابى
و أستهجى فيه قرى
و التقتى بأعيد حسابى
بس عمرى ما أنحنيت
بس عمرى ما أنحنيت

لفين حنروء

يا طائر و الجناح مجروح
و مش عارف لفين حنروء
و عن جرحك لمين حنروء
براحك .. كل يوم بيضيق
والمك .. بحر موجه غريق
و مش لاقى لبيكره رفيق
فى أحضانه ترد الروح
يا طائر و الجناح مجروح
يتحلم تلتقى فرحك
و بتدارى فى عينك النوح
عشان تكبر على جرحك
تغالب ربح مانغبهاش
و ف شبك الأسى تنحاش
و رغم القسوه و جراحها

تزيد حنيه ما بتقساش
زمالك .. إرتضى سكونه
و صبرك .. فاض على شطوطه
و أمك .. إنخنى صوته
و رغم الجرح و التباريح
بتتحدى هبوب الريح
وتتحداك
وتشكى لى ضناك و أساك
و أنا فارد جناحي معاك
و فاتح قلبى لك شباك
لحلم جديد
م أنا فى بحر الضنى العاتى
غريق زيك بمد اليد
و باحلم طيرى يتقابل
مع طيرك .. فى يوم العيد
.. ..
سافرت كثير فى بحر عنك
تنادينى و نادى عليك
لشط هوك تعدينى
وشوقى و لهفتى و حيرتى
بيترجوك تحسينى
ياريت أقدر فى يوم أنساك

و تنسينى
ياريت أقدر أجيب ساحر
يلمك من شرايينى
و أجيب شاعر يكون عاشق
عشان بعنيه تشوفينى
بقيتى النبض و الاحساس
بقيتى ضى نور عينى
فما تلومينى
إذا حبى اللى ضاع منى
أضاع ف عنيكى تكوينى
يا أندر زهره ف الدنيا
جمال الروح ببسينى
و من ضيك عرفت النور
و شلت الضلمه من طينى
يا أحلى قصيده باكتيها
حروفها ضى نور عينى
منايا أكتب على صدرك
و أنا با حلم ... دواوينى
تنادينى ... تقولى إوصفنى
أقول عاجز ... جمال حير تفانينى
تقولى الشوق ... أقول عاتى
فى بحر عنيك بيرمينى

تقولى اتمنى ... أقول أحلم
فى يوم وصلك يمينى
تقولى الشعر ... أقول إنت
بالهامك كتبتينى
تقولى الوجد ... أقول لحظه
فى أحضانك تضمينى
تقولى لسه أياه تانى
أقول حبك بيحيينى
و خايف يوم تقابلينى و انلاى عليك
بصمت عنيك تجاوبينى

يا أم التوب الطويل

يا أم التوب الطويل
و العود ريان نحيل
وعيون سيوف بواتر
بجفونها الكحله ليل

.. ..
م تهدى الخطوه حبه
قلبي مولع يا شابه
ليه كل م زيد محبه
هواكى بيستخبى ..
تحت الرمش الكحيل

.. ..
خد الجميل يا وردى
يا عود ريحان مندى
و آه منك يا وعدى

نفسى يا حلوه أعدى
أشرب م السلسبيل

.. ..

رمان الحلو طاب
و أنا مستنى الجواب
حبس الجمال عذاب
ردى ينوبك ثواب
أشفى القلب العليل

.. ..

ما تسمعيش حسودك
شكوت تفاح خدودك
طاب الرمان بعودك
وفتح شبك صدودك
متخليهوش يميل

.. ..

صدرك تحت الضفيره
ليه وقعته فى حيره
كله أشواق و غيره
و الله ما جبت سيره
و لا شغت لك مثيل

.. ..

حطيت حسنك فى كفه

وهوى العشاق فى كفه
مالقتش الحب وقا
ولا وصفه الحسن كفا
حتى لو بالقليل ...

.. ..
طلى يا حلوه طله
د الشوق فى القلب خلا
حبك روايحه هلا
مكسوفه منى ولا
نسه الطريق طويل

.. ..
يا أم التوب الطويل
و العود ريان نحيل
و عيون سيوف بواتر
دلىنى ع السبيل
دلىنى ع السبيل
.. ..

خليني أحس إني راجل

ياوليه إهتني حبه بمظهرك فى البيت
و غيرى الجلايه اللي هراها الزيت
والعصبه فكيتها أنا .. من مثلها مليت
طول النهار فى الغسيل و الطبخ و التنفيض
راح فين جمالك زمان اللي ملان تحريض
عجبك كدا منظر بتخوفى العفريت

حسى بمشاعري يا هانم .. و اعرفى لك جوز
مش كل حبه التقيكى ضربه لك ميت بوز
و إن قلت فيه أيه ؟ .. دموعك تملأ عشرين كوز
خليتى عيشتى ما بين الآه و تنهيدة
ما تكنش د خطه سابقه لإنتحارى ؟ بجوز

مش شايفه جارتك سماسم كلها شياكة
و شعرها ديل حصان و ف آخره مساكه
و واقفه زى الغزال والشفه ضحاكه
و جوزها عمال يغازل فيها ... كله نشاط
أبص أشوفه التقينى ... عقلى شت وشاط

ما هي ست زيڪ ... لكن مش عامله سباكه

.. ..
أنا نفسي أشوفك في عيني أجمل الستات
و لابسه متزوقه ... و لا أجمل الجميلات
خليني احس اني راجل لسه لسه له شنيات
يبص لك ينتشى .. ويقول صلاه الزين
و الحب يرجع صبي .. نفضل معاه حبيبين
و نعيش في بيت فيه هنا كله تبات و نبات

إعـمـلى مـعـروف

نفسى أقول لك بحبك .. تضحكى بكسوف
وتقولى قولها كمان .. مش مره .. قولها الوف
أقول بحبك .. بحبك .. و الفؤاد ملهوف
تقولى لى بتحس أيه .. ساعه م بتقولها
باحس نار جو قلبى هواكى شعلها
و بقيت متم بحبك إعـمـلى مـعـروف

بتدارى أيه .. هو ده يتدارى ع العاشقين
ما هو كلهم جربوا نار الهوى و عارفين
و اللى إحنا خافيين نقوله .. هم به حاسين
هو حرام إننى أحبك او تحبينى
إذا كان مقدر ومتسطر على جبينى
د نبض قلبى إنت.. و إنت ضى نور عينى

لا هو عيب ولا محرمينه عثمان نخاف منه
د الحب هو الحياه ملناش غنى عنه
و الله لو جربوا حبك لينجنوا
أنا باعذر اللى بيعزل فى الهوى ويلوم

أصله ما جريش فى بحر ضناه العوم
و لا حس إحساس قلوب فى حبها إتهنوا

أقول بحبك بقى ؟ وموافقه ؟ ما تخبيش
و ما تقوليش بأكسف منك .. ما تنكسفيش
أنا دبت من نظرتك .. هو إنت ما دبتيش
لأ لا بلاش تهريى .. و تغيرى الموضوع
و زى عادتك تقولى .. وقفت فى الممنوع
خللى الرضا نظره منك مش كلام مسموع
وعنيك تقول لى بحبك .. و إنت ما ترديش

كان غيرك أخطر

أعلنت ليه التحدى و انت مش قده
و لا قد بحر الهوى فى جزره أو مده
و لا تقدرش تهربى فى قربه أو بعده
و عملتى بينك و بين الحب سد كبير
و قلتى اتحدى يرجع قلبى تانى أسير
و ف لحظه فاض الهوى حطم جدار سده

.. ..

مش قلت لك مستحيل حتقاومى إعصاره
د عنيد و ساحر و تاه الناس فى أسراره
بيخدر القلب لما تلهلك ناره
تشكى الضنا و العذاب و السهد و جراحه
لكن بنرجع و نطلب عفوه و سماحه
و اتحدى لو تقدرى تتحدى تياره

.. ..

كان غيرك أشطر و قبلك فيه ملوك هاموا
وأتزلوا عن ملكهم .. خاضعين لاحكامه
الحب مالوش كبير يقدر على خصامه
الحب يأمر قلوبنا .. و إحنا نمشى وراه
و أنا قبل منك قاسيت منه و دقت الآه
و ما شكيت ردى .. و حكم باعدامه
..

براويز عاطفیه

برواز

بروزت صورتی أنا و انت و بزوقها
علشان فى عيد حينا ع الناس نفرقها
و كتبت لك تحتها للذكرى أحلى كلام
حبك بدايه الحياه و الفرح و الاحلام
صورتى و صورتك و برواز قلبى طوقها
لو تسمى تفتحى قلبك أعلقها

المليون و واحد

كنت آخر واحده أصدقها فى حياتى
بعدها حرمت أصدق واحدة تانى
كنت أنا المليون و واحد لما قلتى
يا حبيبى .. إنت حبى الأولاتى

* * *

مسموح القتل

إن كنت خايفه أنجرح فى الحب أنا مجروح
و إن كنت خايفه أخدعك قلبى كتاب مفتوح
و إن كنت خايفه الهوى يقتلنى فى حبك
فالقـتـل بين الاحبه فى الغرام مسموح

وصل

قالوا ضناك الهوى والسهد يا مشتاق
أنا قلت وصل الحبيب للمجروحين ترياق
قالوا ما شفنash كذا فى الحب من قبلك
أنا قلت هو الذى شاف زى الذى حب وداق

* * *

ندم

مسيرك يوم ح تتألم
وتعرف طعم آه الحب
و ترجع تانى تتندم
تلاقى قلب غير القلب
و بكره ياما تتعلم
ما فيش إنسان كبير ع الحب

* * *

تلميح

فكه الزرار فوقاني ليه ؟ .. بلاش تلميح
و عامله شعرك يا حلوه .. ف الهوى مراجيح
و بتضغطي ع الشفايف .. تقتلي المجارح
و تقلبي بين إيديكي .. البك و المفاتيح
و كل حبه تبصى و القلق باين
هو الهوى بيعتنوا عنه ولا تصارح
* * *

فيونكه

لأنك في قلبي بقيتي الأميره
وروحى اللي هايمه بقت لك أسيره
لأنك ضحكتي على الشيب وقلتى
بأن البياض للقلوب الكبيره
وخليتي عمرى رجع له شبابيه
ووقعتي قلبي اللي حبك في حيره
سحرتيه بقربك ولما إنشغل بك
عملتيه فيونكه في طرف الضفيره

* * *

متحاولش

إنت بيعت و أنا اشتريت
و انت بالغدر إبتديت
ياما سُنقت كثير دلالك
و اللي بينا هان عليك
و أما زهر هوانا فتح
سبته يدبل بين إيديك
ما تحاولش الجرح أكبر
و انت جوايا انتهيته

* * *

خوف

بحبك و لكن مانش قادر أقول
بانك يا روى ربيع الفصول
بحبك و خايف أقول لك بحبك
نقولى بحبك .. تتوه العقول

* * *

صفه

بافتح محار اللآلى التفتك فيه
يا لؤلؤه و اللقا كان حلم بأحلم بيه
الى إنسعد وأنوعد بالوصل إتهنى
و الى إنجرح فى الهوى
نظره ف عنيك تدويه

* * *

در دحه

قلبي غشيم في الهوى .. متدر دحيه حبه
و علميه يعمل آيه .. د الحب نار شبه
و قولى له آيه في الغرام .. ببيان ويتخبى
و متسوقيش الدلال .. على قلبي يا شبه
حبه بحبه عليه لا يطب في حبك
تتخضى تتلعبى .. و تروحي فيه طبه

* * *

طلاق تلاته

تلاتين يمين ما أنت ساكنه قلبى بعد اليوم
و مقيش لزوم للمحاييله والبكا و اللوم
وحصد جيش الهوى لو شن الف هجوم
قالت لى زى العرب غضبك مالوهش لزوم
شجب و جعير والبيان يخلص تروح فى النوم
فاكر إحتلال العواطف للقتوب لعبه
حتقول كفايه حياتك فى الهوى تعب
زى العرب قولت لك .. راح ترضى بالمقسوم

الشاعر فى سطور

- صدر له ديوانين :
- ديوان كلمات فيها حراره (مشارك) ١٩٦٩
- ديوان إقتلوني واقفا ١٩٩٩ (الهيئة العامة لقصور الثقافة).
- محاضر مركزى بالهيئة العامة لقصور الثقافة .
- من رواد شعر العاميه منذ الستينات .
- ترجمت بعض أعماله مثل قصيده الطور الى الانجليزية و الاسبانيه .
- كتب العديد من أغاني الافلام والمسرحيات مثل فيلم (اسكندريه كمان و كمان) للمخرج يوسف شاهين .
- فيلم غراميات زوج للمخرج فايز حجاب .
- كتب المادة العلمية والتعليق لأكثر من فيلم تسجيلي .
- كتب لمسرح الأطفال .
- كتب اغاني اكثر من ١٢ مسرحيه .
- له تحت الطبع :
- ديوان (وقال الحمار) .

- ديوان (اقول لمين) .
- حصل على العديد من الجوائز و الدروع وشهادات التقدير .
- كرمته وزارة الثقافة بمنحه درع الوزارة عام ١٩٩٨ .
- حاصل على جائزه الفن والثقافه فى عيد الفن على مستوى الجمهوريه .
- العنوان كوم حلين _ منيا القمح _ محافظة الشرقية

تليفون : ٠٥٥٣٦٦٢١٧٢
م / ٠١٢٤٤٦٣٧٠١

رقم الإيداع بدار الكتب

٢٠٠٧ / ١١٩٠٨

الترقيم الدولي I.S.B.N

977-374-307-1